

**Uunga siunnersuut: Nunaoil A/S pillugu Inatsisartut inatsisaata
atorunnaarsinneqarnera pillugu Inatsisartut inatsisaat**

Aatsitassanut Inatsisillu Atuutsinneqarnerannut Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneernejarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Hans Peter Poulsen, Siumut, siulittaasoq
Inatsisartunut ilaasortaq Jens Frederik Nielsen, Demokraatit, siulittaasup tullia
Inatsisartunut ilaasortaq Asii Chemnitz Narup, Inuit Ataqatigiit
Inatsisartunut ilaasortaq Mariia Simonsen, Inuit Ataqatigiit
Inatsisartunut ilaasortaq Kuno Fencker, Siumut
Inatsisartunut ilaasortaq Lars Poulsen, Siumut
Inatsisartunut ilaasortaq Jens Napaattooq, Naleraq

UKA 2022-mi ulloq 29. september 2022 siullermeerinninnerup kingorna ataatsimiititaliap sunnersuut misissorpaa.

1. Siunnersuutip imarisaa siunertaalu

Siunnersuut Nunaoil A/S pillugu Inatsisartut inatsisaata nr. 15, 7. december 2009-meersup atorunnaarsinneqarnissaanut tunngavoq. Nunaoil A/S pillugu Inatsisartut inatsiaanni § 1 naapertorlugu ikummatissanut akuersissutini Namminersorlutik Oqartussat peqataanerisa kiisalu Kalaallit Nunaanni Kalaalillu Nunaata avataani suliaassat tamatumunnga atatillugu pissusissamisoorlutut inissisimasut isumaginissaat Nunaoil A/S-ip siunertarigaa siunnersuuteqartup paasissutissiissutigaa. Siunnersuuteqartup nangilluni paasissutissiissutigaa Naalakkersuisut ulloq 24. juni 2021-mi aalajangertut ikummatissanut akuersissutinik tunineqarnissamik qinnuteqaateqaqqusisarneq aammalu Kalaallit Nunaanni tamarmi ikummatissanik misissuinnissamat qalluinissamullu akuersissutinik nalunaaruteqartarneq unitsinneqartoq. Kiisalu siunnersuuteqartumit paasissutissiissutigineqarpoq Nunaoil A/S pillugu Inatsisartut inatsisaata atorunnaarsinneqarneratigut ingerlatseqatigiiffiup malittarisassaani siunertamut aalajangersakkap allannqortinnissaanut periarfissaqalissasoq, taamaalilluni ingerlatseqatigiiffik ingerlatani

allani ikummatissanut akuersissutitut toqqaannartumik atassuteqanngitsuni suleqataasin-naalissasoq.

2. Siunnersuutip Inatsisartunit siullermeerneqarnera

Siullermeerinninnermi siunnersuut amerlanerussuteqartunit tapersernejarpog. Tamatuma saniatigut ingerlatseqatigiiffiup ingerlaqqittut siunissami siunertarisassaa aningaasaqarnikkullu pissutsit atugassai inersuarmi oqallinnermi annertuumik qitiutinnejarpog.

3. Tusarniaanermi akissutit

Tusarniaanermi akissutit inatsisissatut siunnersuummut ilanngunneqarsimappog, tamannalu Inatsisartut Siulittaasoqarfiata ilusiliinissamut piunnaasaqataanut naapertuupog.

Siunnersuummilli tusarniaanermi piffissaritinnejartup sivikinnera uparuarneqassaaq. Siunnersuummut nalinginnaasumi nassuiaatini allassimavoq siunnersuut piffissami 5.-26. juli tusarniaassutigineqarsimasog, tassa sapaatit akunnerini pingasuni (ulluni suliffinni 15-ini). Pingaarnertut malittarisassatut sapaatit akunnerini sisamani tusarniaanissamut piffissaqartitsinissaq malinneqartariaqarpog.

4. Ataatsimiititaliap siunnersuummik suliarinninnera

Amerlanerussuteqartut siunnersuummut tapersiinerat ataatsimiititaliamit maluginiarnejarpog. Aammalu siunnersuutip matuma akuersissutigineqarneratigut ingerlatseqatigiiffimmut maanna siunertaasog atorunnaassasog ataatsimiititaliamit maluginiarnejarpog. Tamanna ingerlatseqatigiiffiup ingerlaqqittup siunissaanut tunngasumik apeqqutitut tunnganerusumik sivisuumik oqallinnermut tunngavissiiog.

Oqallinneq apeqqutitut makkununga ilaatigut tunngavoq:

- Ingerlatseqatigiiffimmut ingerlaqqittumut aningaasaqarnikkut allaffissornikkullu kingunerisassat, siunissami ingerlatanut tunngavissusat.
- Ingerlatseqatigiiffiup ingerlaqqittup aqqissuusaaanikkut ingerlatsinikkullu kiisalu niuernikkut angaasalersugaanikkullu periarfissaanut Naalakkersuisut qanoq naatsorsuteqarnersut.
- Siunissami ingerlatassat aningaasaqarnikkut illersorneqarsinnaasumik ingerlatseqatigiiffimmit ingerlaqqittumit isumagineqarsinnaanissaat Naalakkersuisunit, Namminersorlutik Oqartussat aktiaatilititut soqutigisaannik isumaginnittut, qanoq qulakkeerneqarsinnaanersut.
- Ingerlatseqatigiiffiup siunertaanik atorunnaarsitsinerup nassatarisaanik ingerlatseqatigiiffiup matunissaa naapertuunnerpaajunnginnerisog.

Ingerlatseqatigiiffiup ingerlaqqittup siunissaa inaarutaasumik paasinarsisinnegartussanngorpat qulequttat taakku tunngaviulluinnartut oqallisigineqartariaqarlutillu inissinneqartariaqartut ataatsimiititaliaq isumaqarpoq. Apeqqutit taakku siunnersuummi matumani qitiusumik qulequtarineqartup aalajangiiffigineqarnissaanut tunngatillugu aalajangiisuunngitsutut ataatsimiititaliamit isigineqarput. Ingerlatseqatigiiffiup ingerlatanik sunik ingerlatsisinnaanerata Naalakkersuisunit, Namminersorlutik Oqartussat aktiaatilittut soqutigisaannik ingerlatsisutut, taamanikkussamut erseqqinnerusumik qulaarneqareerpat apeqqut taakku ataatsimiititaliap isumaa malillugu qaqqinngitsoorneqarsinnaanngillat. Tassunga atatillugu Inatsisartut Inatsisartullu ataatsimiititaliaat susasaqartup sulinermi tassani akuutinneqarnissaat ataatsimiititaliamit naatsorsuutigineqarpoq.

Ingerlatseqatigiiffiup siunissaanut akisussaaffik Naalakkersuisut Siulittaasuata ataaniissasoq suliassaqaarfimmut Naalakkersuisuusup naggasiutigaa. Tamanna ataatsimiititaliamit paasinittumik pissuseqarfigineqarpoq. Tamatumalu peqatigisaanik ataatsimiititaliap paasinninnera malillugu ineriartorneq pinngortitamut mianerinninnerusooq imminullu napatissinnaasoq siunissami salliutinneqassasoq siunnersuummik siullermeerinninnermi nalinginnaasumik isumaqatigiissutigineqarpoq.

5. Siunnersuutip aningaasaqarnikkut kingunerisassai

Siunnersuutip akuersissutigineqarnerani aningaasatigut kingunerisassai nalinginnaasumik nassuiaatit ataani nalunaarneqarsimapput. Tunngavissatut pigineqartut tunngavigalugit allamik naliliinissamut ataatsimiititaliaq tunngavissaqanngilaq.

6. Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqtatigiinneersut, Siumumeersullu siunnersuut akuerineqassasoq inassutigaat.

Ataatsimiititaliami ikinnerussuteqartut Naleqqameersup Demokraatineersullu siunnersuut itigartinneqassasoq inassutigaat.

Inassuteqaammut tunngatillugu Demokraatit ikinnerussuteqarlutik ima oqaaseqaateqarput:

”Demokraatit akuerisinnaanngilaat apeqqutit pingaarutillik akineqanngittut, siunnersuullu taamaattumik itigartillugu. Inatsit allannngortinneratigut Nunaoil A/S allamik siunertalerlugu ingerlatinniarnegalerpoq taamaattorli sunarpiaq pineqarnerusooq naammangittumik akineqarluni. Isumaliuutissiissummi imm. 4 ataani apeqqutit naammattumik akineqartinnatik una siunnersuut akuerineqarsinnaanngilaq, tamanna kukkunerussaaq.”

Inassuteqaammut tunngatillugu Naleraq ima ikinnerussuteqarluni oqaaseqaateqarpoq:

”Selskabeq ooriuteqangaatsiartooq millionerpassuarnik ooritaqartoq siunertaaruteriarlugu, ersarinnerusumik siunertalernagu Naalakkersuisooqatigiit siunnerfeqarnerat Naleqqamiit toqqissisimanartinngilarput. Suliffeqarfiutigut aningaasameertut Naalakkersuisut aningaasameertut, aningaasarpassuit illukartinniarneqarnerat qanoq atorneqassanersut oqaatigina-veersaarlugu iliuuseqarneq apeqqusernartoqartipparput. Taamatut Naleqqamiit akuer-saanginnitsinnut toqqammavigaarput selskabinut pallittaalisalersorluni ingerlatseriaatsimik ingerlatseqqiineq ammasumik periuseqarluni sulinerunngimmat akerlaraarput. Naleqqamiit isumaqaratta suliffeqarfik siunertaa peerneqarpat aningaasarpassuit landkarsimut nakkartittartariaqartut Naleqqamiit isumaqaratta.”

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Hans Peter Poulsen
Siulittaasoq

Jens Frederik Nielsen
Siulittaasup tullia

Asii Chemnitz Narup

Mariia Simonsen

Kuno Fencker

Lars Poulsen

Jens Napaattoq